

Turisssem e sport d'enviern en il Grischun

■ En il Grischun vegnivan utilisads dapi il temp medieval tardiv scarsolas, gianellas ed ina sort da skis sco utensils da lavur. A l'entschatta dal 19avel tschientaner gievan ins cun patins sin ils lais schelads. Il sport d'enviern modern ha cumenzà en ils onns 1850. Il 1869 ha Tavau realisà l'emprim glatsch artificial ed il 1880 fundà l'emprim club da patinadi dal Grischun. Dal 1880 datescha l'emprim giu da curling a San Murezzan. A partir dal 1890 èn suandads gieus da hockey sin glatsch, organisads da giasts englais a Tavau, Arosa e San Murezzan. Il 1921 è vegnì fundà il Club da hockey Tavau ch'ha introduci il sport da hockey modern en il Grischun.

Enturn il 1860 ha construi Samuel Hnatek da Segl Maria l'emprima aissa da naiv. Il 1880 èn ids Carl Spengler e Wilhelm Paulcke cun skis a Tavau, ed il 1893 han fatg Tobias e Johann Branger l'emprima tura da skis da Tavau ad Arosa. Ils emprims clubs da skis èn vegnids fundads il 1903 a Tavau ed a San Murezzan, il 1904 ad Arosa ed a Puntraschigna. Quests clubs organisavan curs da skis e cumpetiziuns. A partir dal 1900 èn vegnidas organisadas concurrenz da passlung e da sigl cun skis, il 1908 l'emprima cursa rapida a San Murezzan. Il Derby da Parsenn, inizià il 1924, è daventà la concurrenza da skis la pli enconuschenta en il Grischun.

Ils dus gieus olimpics d'enviern dal 1928 e dal 1948 a San Murezzan èn stads da grond'impurtanza per il svilup dal sport d'enviern en il Grischun. Ils sportists da skis grischuns sco David e Nini Zogg, Anny Rüegg, Walter Prager, Rudolf Rominger, Edi Reinalter, Andreas Däscher ed auters han cuntanschi renum mundial.

Il Maraton da skis engiadinais, organisà dapi il 1969, è cun passa 10 000 partecipantas e partecipants il pli grond eveniment da sport en il Grischun.

La schlieusa è sa sviluppada en il 19avel tschientaner d'in vehichel da lavur ad in urdain da sport. Il 1879 è vegnida construida sin iniziativa da giasts englais ina via da scarsolar da Tavau a Claustra. Il 1888/89 han gi lieu las emprimas cursas da bob en il Cresta-Run a San Murezzan.

Il sport d'enviern, che pretenda implants ed indrizs da transport adina pli effizients, è daventà en il decurs dals davos 50 onns il factur il pli impurtant dal turisssem en il Grischun. Kurt Wanner

Telefericas e funicularas

La construcziun da telefericas ha promovì ed accompagnà permanentamain il svilup dal turisssem en il Grischun. Enturn il 1900 èn vegnids lantschads plirs projects betg realisads, per exempel per pendicularas sin la Fuorcla Surlej e sin il Piz Güglia (1904). Il 1899 è vegnida construida l'emprima teleferica dal Grischun, numnadamain la Funiculara Schatzalp a Tavau, il 1907 quella da Muottas Muragl. Cun la Funiculara Chantarella-Corviglia ha obtegnì San Murezzan il 1928 l'emprima teleferica en Svizra, destinada spezialmain al sport



Bolgen/Tavau – l'emprim runal modern en l'istorgia dal turisssem d'enviern.

da skis en svilup. Il 1934 han ins avert a Bolgen/Tavau l'emprim runal «modern», vul dir cun giuf per duas persunas (premiera mundiala, lunghezza 270 m) ed il 1935 è suandà il runal da Suvretta/San Murezzan (800 m). Ils 16 da december 1945 han ins mess en funcziun a Flem-Foppa l'emprima sutgera accuplabla dal mund ed in'emna pli tard è vegnida averta ina sutgera a Puntraschigna-Alp Languard. En ils onns 1950 èn vegnidas installadas las emprimas pendicularas e telecabinas en il Grischun. Cun la construcziun dal runal da la Diavolezza (regiun dal Bernina), l'emprim runal sin in vadretg da la Svizra, è vegnì pussibilità il 1959 era il manaschi da skis durant ils mais da stad ed il 1978 han ins messa en funcziun las emprimas telecabinas per sis persunas sin il glatscher dal Vorab a Flem.

La davosa staziun da sport d'enviern moderna, averta tras pendicularas, è vegnida realisada il 1978 en il Samignun. Il concept turistic da la Confederaziun limitescha dapi alura las pussaivladas da realisar pendicularas en las muntognas, tranter auter per proteger la natira. Ins sa concentrescha sin meglieraziuns tecnicar e sin novas tecnologias. Premieras tecnicar svizras suenter il 1980 èn: sutgeras francadas per trais persunas (Sursaissa, 1981), telecabinas cun ina capacitat da transport da passa 2000 persunas/ura (Alp Marguns/Schlarigna-Corviglia/San

Murezzan, 1984), telecabinas circularas per 12 persunas (Lags-Curnius, 1989), cabina a dus plauns (novitat mundiala, Samignun 1995), sutgera da sis accuplabla (Alp Marguns/Schlarigna-Trais Fluors 1995), pendiculara circulara a propulsiun directa (pista «FIS» sin la Corviglia/San Murezzan, 2002), sutgera cun viertgel da protecziun e stgudament dals sez (Scansinas-Mutta Rodunda/Lags, 2005).

L'introducziun da professiuns specificas cun diplom federal: spezialist da pendicularas 1985, expert dal servetsch da pistas e da salvament 1992. Il 2005 èn ids tut en tut 20 % dals implants e 28 % da la quota da participaziun al martgà al chantun Grischun (suenter il Vallais cun 29 % resp. 33 %). Dumber da persunas transportadas cun telefericas durant l'enviern 2005/06 56,4 miu. (emprima entrada) e durant la stad 2006 2,3 milliuns. Il Grischun dumbrava il 2009 total 162 implants cun concessiun federala, 402 cun concessiun chantunala.

Adolf Collenberg

Carl Spengler

* 30 da zercladur 1860 a Tavau, † 15 da settember 1937 a Tavau, reformà, da Tain. Figl dad Alexander. Frar da Lucius. Elisabeth nata Brockmann, vaiva Richter, da Potsdam, figlia da Carl Heilmann, editur. scola chantunala a Trogen/AR. Studi da medischina a Turitg, Heidelberg e Strassburg. Dr. med., chirurg e bacteriolog. Scola ed assistent da Robert Koch 1892–96, alura directur dal Sanatori Alexanderhaus a Tavau e perscrutaziuns davart la tuberculosa ed il cancer. Ses preparats d'anticorps èn sa demussads sco effizients. Spengler, ch'è stà in dals promoturs dal lieu da sport da Tavau, ha fundà il 1923 il Cup Spengler per hockey sin glatsch cun la finamira da reunir puspè en contacts sportivs la giuventetgna da nazions daventadas inimias tras l'Emprima Guerra mundiala.

Peter Bollier

Henry Hoek

* 17 da mars 1878 a Tavau, † 20 da november 1951 a Vaduz, catolic, Ollandais e Tudestg, a partir dal 1939 da Tavau. Figl dad Isaac Hermann Jakob, banchier, e da Mary nata Bulkley, Irlandaisa. ∞ 1)

M. nata Kaltenbach, 2) 1920 Elisabeth nata Harth. Gimnasi ed, a partir dal 1896, studi da geologia a Friburg e. Br., promoziun 1903. Publicaziuns davart l'intschess da la Plessur, viadi geologic en l'America dal Sid 1904–05. Piunier da skis sin il champ teoretic e pratic: campion da skis da la Germania 1902, primascensiu d'enviern e cun skis dal Finsteraarhorn, Mönch, Dammastock, Strahlhorn e Wetterhorn. Il 1908 ha Hoek publicà l'emprim guid da skis dal mund («Skifahrten im südlichen Schwarzwald»), alura manuals davart l'ir cun skis per las regiuns da Tavau-Parsenn e da Planeiras/Lai sco era guids da viandar per la regiun da Tavau, l'Engiadina e Zermatt. Suenter l'Emprima Guerra mundiala ha il «scuvrider sportiv da Tavau» publicà numerusas ovras (tematicas, litteraras, liricas) surtut davart il sport e las muntognas. Il 1934 ha Hoek translocà a Tavau, il 1949 a Vaduz.

Andrea Weibel

David Zogg

* 18 da december 1902 ad Azmoos (vischnanca da Wartau/SG), † 26 da fanadur 1977 ad Arosa, reformà, da Grabs/SG. Figl d'Andreas, electricist, e da Maria Elisabeth nata Jahn. Frar dals sportists Nini von Arx-Zogg e Fritz Zogg ∞ Heidi nata Frey. Numnà era Vitter Zogg. Scolas ad Arosa. Electricist, guid da muntogna e magister da skis. Confundatur dal Club da hockey dad Arosa 1924, manader da la scola da skis ad Arosa 1939–74. Zogg è stà il skiunz svizzer il pli renumà en ils onns 1930. Il 1928 ha el participà a l'olimpiada a San Murezzan en la sparta nordic ed ha fatg en il sigl cun skis in record svizzer (66,5 m). El è stà sis giadas campiu svizzer en la cursa rapida en ils onns 1930 ed ha conquistà numerusas medaglias en cursas e campiadis naziunals e mundials. Il 1934 è el daventà a San Murezzan campiu mundial en la cursa rapida e segund en il slalom ed en la cumbinaziun. Zogg ha gudagnà tshintg giadas il derby dal Parsenn. Expediziun en Grönlanda 1931. Cun André Koch e Fritz Steuri ha el realisà il 1939 la primascensiu dal Dunaghir/Himalaja (7066 m), superond qua tras sco emprims Svizzers suenter Günther Oskar Dyrenfurth ina muntogna da 7000 m.

Adolf Collenberg

Giovanni Testa

* 31 da fanadur 1903 a Bravuogn, † 18 d'october 1996 a San Murezzan, catolic, da Clavenna ed Arvigo (dapi il 1947). Figl da Giovanni Ezio, seller, e da Maria nata Bazzi. ∞ Irene nata Caretoni. Possessor d'in affar da tapezader a San Murezzan, magister da skis e fundatur da la scola da skis dal lieu (1929). Curridur alpin e nordic cun diplom als Gieus olimpics dal 1928 a San Murezzan. Il 1933 ha Testa sviluppà, ensem cun il medi da Minca Eugen Mathias, ina tecnica speziala da far stortas cun skis che correspundeve al plitgusch al moviment natural dal corp e che dueva diminuir il privel da grevas ruttadiras da las chommas, sco quai ch'i capitava quella giada savens cun ir cun skis en il stil convenziunal. Dal 1967–69 è el stà commember dal Cussegl grond dal Grischun per la Partida populara conservativa e cristiansociala.

Adolf Collenberg

Georg Häslar

* 18 da fanadur 1907 a Wintertur, † 31 da schaner 1985 a Tavau, reformà, da Wintertur. Figl da Georg, roder, e da Theresia nata Sallé. ∞ Helen nata Eichenberger. Suenter ina furmazion d'architect, ha Häslar lavurà en il biro d'architectura da Rudolf Gaberel a Tavau. Il 1942 ha el surpiglià la direcziun da la societad da cura da Tavau ch'el ha manà fin il 1968. El ha contribuì a transformar quest vitg d'in lieu da rehabilitaziun ad in center da sport e da vacanzas da cura ed ha conferì a quel ina reputaziun internaziunala sco center per ils sports sin glatsch: en sia funcziun da secretari da

l'Uniu internaziunala da patinadi ha Häslar organisà tranter il 1947 ed il 1975 var 30 campiadis europeics e mundials da patinadi artistic e da sveltezza sin il glatsch da Tavau. Dal 1956–75 ha el presidià ultra da quai la Scola svizra da skis da Tavau.

Andrea Weibel

Peter Kasper

* prim da mars 1911 a Puntraschigna, † 26 da mars 1990 a Berna, reformà, da Claustra, Puntraschigna e San Murezzan. Figl da Hans, selvicultur e guid da muntogna. ∞ Rita nata Lori. Scola chantunala a Son Gagl, scolaziun commerziala e turistica. Secretari da cura 1945, directur da cura da San Murezzan 1946–78. Kasper ha participà decisivamain a la revitalisaziun da San Murezzan sco lieu da sport e da bogns da cura suenter la Segunda Guerra mundiala, tranter auter sco promotur da grondas occurrenz sco ils 5avels Gieus olimpics dal 1948 ed il Campiadis mundial da ski alpin dal 1974. Sco expert renconuschì è Kasper stà commember directiv da numerusas instituziuns da sport, turisssem e balneologia sin plaun naziunal ed internaziunal. Autur da numerusas publicaziuns davart il turisssem, la balneologia e l'istorgia locala (per exempel «Engadin: ein Zipfel vom Paradies», 1981, ensem cun H. Maegerlein).

Silvio Margadant

Andreas Däscher

* 9 da zercladur 1927 a Clavadel (vischnanca da Tavau), reformà, da Luzein. Figl da Hans, stradin, e dad Ursina nata Däscher ∞ Nerina nata Mottolini, da nazionalitad taliana. Montader da stgudaments cun in'atgna fatschenta a Meilen/ZH. Sigliger cun skis a partir dal 1943. Däscher è stà l'emprim a siglir il 1950 en ina cumpetiziun internaziunala cun la bratscha tegnida enavos cunter las chommas. Quest «stil da pesch», scumandà per in lung temp en cumpetiziuns, sa basava sin experiments da Reinhard Straumann dal 1926 e permetteva, grazia ad ina reducziun da la resistenza da l'aria, da siglir pli lunsch. Fin il 1950 han ils sigliders applitgà la tecnica cun bratscha schladada. Däscher è daventà nov giadas campiu svizzer ed ha participà quatter giadas a gieus olimpics (gavel rang il 1956).

Thomas Gmür

Roger Staub

* prim da fanadur 1936 ad Arosa, † 30 da zercladur 1974 a Verbier, reformà, dad Oberrieden ed Arosa. Figl da Jules Jean, pictur stuccatur, e dad Annita nata Landolth. ∞ Lilo nata Haussener, annunciadora da televisiun. L'emprim, cun success, giugader da hockey tar l'EHC Arosa. Suenter la tripla victoria als campiadis svizzers da skis alpins dals juniors il 1955 è Staub sa decidì per ina carriera da skiunz. Il 1956 ha el cuntanschi la quarta piazza en la cursa aval a l'olimpiada, il 1958 ha el gudagnà la medaglia d'argient al Campiadis mundial en la cursa aval e mingamai la medaglia da bronz en il slalom gigant ed en la cumbinaziun. A l'olimpiada dal 1960 ha el gudagnà aur en il slalom gigant. Suenter la fin da sia carriera sco curridur da skis il 1961 ha el fundà in'atgna scola da skis a Vail (Colorado) ed ha sviluppà sco commerciant dad artitgels da sport l'uschenumnada chapi-tscha da Roger Staub. Piunier (ensem cun Art Furrer) da l'acrobatica sin skis. Il 1974 è el crudà a mort durant in sgol da test cun in delta.

Adolf Collenberg

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Focus «Sport d'enviern» en la versiun stampada dal LIR.